

Zeitschrift:	Romanica Raetica
Herausgeber:	Societad Retorumantscha
Band:	9 (1993)
Artikel:	Viarva romontscha : contribuziuns davart il lungatg, sia histora e sia tgira
Autor:	Decurtins, Alexi
Kapitel:	Il lungatg romontsch
DOI:	https://doi.org/10.5169/seals-859062

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 24.08.2025

ETH-Bibliothek Zürich, E-Periodica, <https://www.e-periodica.ch>

Il lungatg romontsch

(en: *Graubünden, Grigioni, Grischun*, ed. per incumbensa
dalla Regenza grischuna entrais il Departament d'educaziun, 1984,
pp. 61-69)

Cuntegn

- I Diversitat ed identitad*
- II La veglia Rezia*
- III La romanisaziun*
 - 1. Entschattas*
 - 2. Orientaziun dalla Rezia viers nord e sera*
- IV Il romontsch sereghelia*
 - 1. Il pli vegl text*
 - 2. Origin dils idioms romontschs*
- V Ils idioms da scartira sefuorman*
- VI Lungatg e cardientscha*
- VII Novs temps, novas ideas*
- VIII Lungatg e midadas socialas*
 - 1. Viafier e turissem*
 - 2. Il moviment romontsch e sias entschattas*
 - 3. Smanatschas d'anoviars*
 - 4. La Ligia Romontscha e sias stentas*
 - 5. Novas viultas ed ideas*
- IX Cuntermesiras e sguard egl avegnir*
 - 1. Las apprezzaziuns dil romontsch semidan*
 - 2. Forzas zuppadas vegnan a strada*
 - 3. Tscherca d'identitad e consequenzas*
 - 4. Novs sforzs*
 - 5. In lungatg da scartira unitar*
- X Epilog*

1. Il lungatg romontsch

(svilup, idioms, problematica, perspectivas)

I Diversitat ed identitat

Ils Romontschs sezs han buca sviluppau in sulet lungatg da scartira e da cultura che unescha els sco in ligiom cumineivel. Els partan cunquei la sort da tons auters pievels pigns (Provenzals, Furlans, Dolomitans). En l'umbriva da lungatgs vischins pli pussents (franzos, talian, tudestg) eis ei era buca reussiu ad els da far il pass decisiv all'unitad. Emprovas han ins bein fatg pliras gadas. Ils resultats ein stai ils pli divers. (Pareglia sur da quei tema vol. I, nr. 15; novs aspects sutvar cap. 9.5.).

Ei dat biaras raschuns persuenter. Ellas ein en emprema lingia d'attribuir alla configuraziun encavistrada digl intschess romontsch denter la Val Müstair ed il massiv dil Sogn Gottard. Quella ha promoviu il crescher da numerus dialects d'atgna tempra, mo era conservau quels en lur esser sur tschentaners ora. La cultura sederasa en las muntognas en caums serrai. Plinavon han centers da peisa e da muntada economica, politica e culturala muncau che havessen saviu ulivar las divergenzas e tener la ballontscha. Gia el temps prelittrar, el decuors dil 15avel tschentaner, fuva il marcau da Cuera ius a piarder al romontsch. Aschia ha il tudestg survegniu pils Romontschs era denter els sezs baul ina funcziun carschenta sco lungatg da punt e da comunicaziun.

Nunditgont ina tala situazion pauc encuraschonta, ha ina liunga via ed historia cumineivla schau nescher sentiments e schientscha d'appartenenza alla medema famiglia e la perschuasiun ch'ins sappi midar ils fatgs mo cun serrar adina dapli las retschas. Enviers tuttas adversitads ha il taler dil temps tessiu in ponn romontsch cun in urdiment dètg unitar, mo cun ils pli differents fils d'entratg e dessegns.

Sin tuts ils camps dalla veta san ins constatar valurs cumineivlas, per semeglia sin quel dalla cultura materiala (iseglia, uaffens, baghetgs, process da lavur) sco era sin quel dil lungatg e dalla litteratura (structuras linguisticas, scazi da plaids, litteratura populara: detgas, praulas, proverbis, canzuns popularas). Medemamein sil plaun dil svilup spirtal e religius (lungatg sacral, canzuns religiusas) sco era sin quel dalla veta publica e politica (administraziun, dretg). Il lungatg sez ei sco in arcun che ensiara perdetgas per ina cuminanza culturala zun cumpacta. (Ins comparegli vol. I, pp. 92 ss., 146 ss.).

L'identitat romontscha ei nundispoteivla, era sch'ella sepresenta a prema vesta savens en fuormas e colurs diversas. Gia il num dils Romontschs, la denominaziun generala *romontsch/rumantsch* e quella restrenschida mo sin l'Engiadina, il tierm *ladin*, dattan d'entellir in vegl basegns d'identificaziun. (Dapli vol. I, p. 105).

II La veglia Rezia

Cronists romans han nudau ils nums da pievels alpins (per part retics) ch'ils Romans havevan suttamess. En vesta agl intschess romontsch hodiern endriesch'ins denter auter dils *Riguscs* (Engiadina), dils *Suanets* (Rein Posteriur, Surmir) e dils *Calucons* (Vallada dil Rein en la vischinonza da Cuera). Meins precis ei quei ch'els relatan sur dils lungatgs. Tenor lur meini dueigi il retic haver giu ina certa semegliadetgna cugl etrusc.

Il Grischun romontsch cun ses tschun idioms, cun diember dialects e cun ses vischins tudestgs (tudestg da Cuera, tudestg gualser) e talians, presenta gia per sesez ina babilonia. Ei drova denton buca bia fantasia per sminar che la carta dils lungatgs e dialects fuvi el temps preroman e retic aunc pli gaglia e variada.

Sin tgei pievels, ed oravontut, sin tgei lungatgs ein ils Romans fruntai en nossas muntognas? Da quei savein nus stagn pauc. Novissimas - per part gia veglias - teorias pretendan oz ch'il misteri seigi sligiaus. Il retic, manegia Linus Brunner, seigi parentaus culs lungatgs semitics. Gnanc da dir che quellas hipotesas han piars lur credi ils davos onns. Gia 1973 haveva Gerhard Doerfer (Lautgesetz und Zufall, 58ss.) mussau che la metoda omnicumparastistica da Brunner tegni buca petg ad in examen critic. E quei beincapiu avon che quest s'avischini alla damonda dil lungatg retic (inscripziuns, nums locals).

Ver eis ei ch'in considerabel diember da nums locals grischuns se paleisa sco fastitgs preromans. E quels pertuccan capeivlamein cun zun loghens da vegl enneu habitai, ils nums da vitgs, vischnauncas e da valladas, sco per semeglia: *Tschlin, Scuol, Savognin, Panaduz, Glion, Trun, Lumnezia*. En pliras regiuns ein ils nums preromans pli spess ch'en outras. Els ein sco indezis e statgnas per las eras e faschas da cultura «retica».

Las anfladas prehistoriccas a Motata sper Ramosch, sil Padnal da Savognin, a Crestaulta sper Surin, sill Muota da Falera, confirme schan da lur vart quei ch'ils nums vegliuords lain percorscher. En quellas culegnas ein plirs niveis e currents da cultura vegni neunavon (la cultura da Melaun, da Fritzens/Sanzeno, quella celtica da La

Tène). Displascheivlamein va ei buca da metter ils artefacts anflai ed ils fastitgs linguistics silla medema stadera. Carteivel han els da far pauc u nuot in cun l'auter. Omisdus elements ein denton impurtonts en quei risguard ch'els fan da saver ch'ei ha dau lungatgs e culturas en nossas regiuns ditg avon che quei ch'ins carteva.

Sper pievels e lungatgs vegls prermans, che nus numnein cun resalva «retics», han era schlattas celticas (gallicas) giugau ina rolla egl intschess dalla Rezia. Vagnend dalla Helvezia duein ils Gals u Celts haver scavalcau e traversau las Alps entuorn 400 avon Cristus per sepatrunar dallas planiras fritgeivlas norditalicas. Aunc oz paran numbs locals e numbs da valladas da documentar lur influenza, sco per semeglia: *Breil, Brinzouls, Purtenza*.

Restonzas celticas ed autres cuntegn era il scazi da plaids puril. Ei settracta il bia da talas cun tempra da relict. Ellas pertuccan parts dil lungatg ch'ein restadas nunsmesadas e pauc influenzadas entras midades dalla civilisaziun. Numbs per animals selvadis (*camutsch, sgagia, tschéss, urlaun*), per plontas selvadias (*culeischen, darvena, grusaida, schiember*), per activitads, uaffens e rauba dil pur (*tscharschar, panaglia, penn, tegia, umblaz*), lu cunzun appellativs per fuormas e per la qualitat dil terren (*bleis, crap, cron, grava, grep*).

III La romanisaziun

1. *Entschattas*

Cuort avon l'era cristiana (15 avon Cristus) entscheiva la conquista romana dalla Rezia, igl intschess encugnaus denter la Germania, la Gallia cisalpina ed il Noricum e cunfinas en grondas lingias a nord dalla Donau, encounter sera dils flums Rein ed En ed encounter damaun entras la Salzach e la Drau. Franc eis ei buca stau las muntognas cun lur pievels guerrils che han giavinau igl interess dils Romans, era buca products da nui, sco caschiel, vin e mèl d'aviuls. Ils Romans vulevan il damogn dils passadis alpins che devan access alla Germania e che garantevan da tut temps il transit da truppas, da rauba e dils funcziunaris.

Ils Romans han rabbitschau cun els duas caussas che han levgiau l'integrazion dalla nova provinzia: ina organisaziun militara solida ed in'administrazione efficienta e lonzia. Dotai cun bunas enconuschientschas tecnicas han els baghegiau la reit da vias e cheutras promovi il traffic ed il commerci. Ils giuvens Rets vegnevan recrutai ed organisai en legiuns e cohortas. Gnanc dubi che quei ei stau per

biars ina singulara experienza da veta e manonza romana. In emprendissadi che ha lubiu da ligiar els pli ferm culla sort digl imperi.

Da gliez temps fuva igl imperi roman sesladaus taluisa ch'el cunteneva gia en sesez il schierm dil sgurdin vegnent. Sut igl imperatur Dioclezian (284-305 suenter Cristus) entscheivan las incursiuns dils Alemans al nord dalla provinzia Rezia. Igl imperatur sesprova da vegnir dominè alla situaziun cun sparter la Rezia e far ordlunder duas provinzias cun atgna administraziun: La Raetia Prima cun Cuera sco center administrativ e la Raetia Secunda cun Augsburg sco capitala.

Igl ei buca sclaus che gest l'invasiun dils Alemans ha carscentau sco consequenza il process da romanisaziun ellas parts meridiunalas dallas provinzias. La populaziun romana el nord stueva tschessar sut la pressiun dils Alemans ed empruava da fitgar pei pli a sid.

Per da dretg eis ei denton in'autra forza che ha francau la romanisaziun dalla nova provinzia Rezia: il cristianissem. Sias entschattas selain datar senza resca gia el quart tschentaner suenter Cristus. Ina cumprova persuenter ei la relativa unitad dil lungatg romontsch da baselgia cun sia identidad e sias caracteristicas marcantas. Quei vala era pils numbs (numbs da patruns-baselgia, prenumbs e numbs da famiglia). (Per quella e per las suandontas parts pareglia cunzun vol. I, pp. 106 ss., 110 ss.).

Mo era autrora ha il romontsch mantenu enzennas evidentas dil lungatg latin dils emprems temps digl imperi. Cuntut vegn ei ad ha-ver cuzzau tochen viaden el 6avel tschentaner ch'ils davos suns e tuns preromans ein sestezs.

2. *Orientaziun dalla Rezia viers nord e sera*

Pievels germans (Ostrogots, Gotuns e Francons) ein stai ils artavels pli u meins legitims dil domini roman en Rezia. Mo cun lur vegnida ei la romanisaziun aunc buca tschessada. Perencunter ha ella survegniu dacheudenvi ferms accents digl intsches francon (si dall'Italia Aulta e neu digl occident). La Rezia sto sedrizzar ina se-cunda gada suenter novs patruns, quella gada viers nord e sera/miezdì. Las umbrivas vegnan pli fermas cun il domini francon, dapi 539 suenter Cristus. Igl onn 843 vegn la Rezia distaccada digl aruestgiu da Milaun. Ella passa ecclesiasticamein sut la tutela da Magonza (Mainz).

Pievels alemans e bajuvars semovan pli e pli nunschenadamein encounter sid alla tscherca da tiara nova. Igl emprem fruntan els egl intsches dalla Raetia Secunda ch'els germaniseschan el decuors dils

tschentaners totalmein. Plaunsiu vegn era la Raetia Prima tuccada dallas invasiuns. Denter ils onns 1000-1500 vegnan grondas parts a nord e nordost surfatgas da colonists germans. La consequenza vegn ad esser stau ina liunga convivenza denter Romans e Germans e silsuenter il passadi d'ina cultura linguistica a l'autra. Dalla germanisaziun progressonta relatan aunc oz las stresas dils numbs locals, relicts da plaids romans els dialects tudestgs, mo era tratgs characteristics da lur fuorma fonetica.

La «Renaschientscha carolingica», quei vul dir il giavisch da Carli il Grond da cultivar e luvrar per la purezia dil latin, ha podà suatiu ils nuders dall'administraziun e las stivas da studi dils conventuals, mo strusch il pievel.

Rhabanus Maurus, igl arzuestg da Magonza, repeta en in messadi quei che anteriurs concils havevan gia stipulau, numnadamein ch'igl evangeli dueigi vegnir intermediaus en sia diocesa aschia ch'il pievel capeschi, pia, sch'ei fetschi da basegns, era els lungatgs dalla tiara. Ins astga supponer che talas decisiuns e directivas hagien fullau via era al romontsch naschent, cuntut che quel haveva lu aunc buca sia propria noda-casa. Denton haveva il latin vulgar fatg ina singulara metamorfosa e fuva zanua sin via da daventar in niev lungatg. Glieutas da plaids manuscrettas dil temps attestan quei. Ils schinumnai glossaris, che scolars premurai han fatg cun compareglier lur scazi da plaids latin u latin-vulgar cun las correspondenzas germanas. Ils plaids latins fan endamen resuns dils lungatgs neolatins dad oz, saven schizun atgnadads romontschas.

Documents latins d'impurtonza per la historia dallas Alps e per lur colonisaziun, sco per semeglia il Testament digl uestg Tello (765), la Lex Romana curiensis (da circa 850) ni las Leschas penalas digl uestg Remedius lain gia transparer certas conturas dil romontsch. Ultra da quei sefa valer en els spért e cuntegn german. Quei se resulta aunc pli ferm dils documents retolatins dalla Rezia Bassa da 1000-1200, relaschai frequentamein a Vinomna/Rankweil (damaneivel da Sogn Pieder/Feldkirch) ed a Sogn Gagl. Cheu engart'ins era noziuns ed expressiuns dil dretg german, che van per part vi el romontsch, e che dattan a quel ensemble cun il lungatg da baselgia sia urdadira speciala. (Pareglia vol. I, nr. 6).

IV Il romontsch seregheglia

1. *Il pli vegl text*

Ils pli vegls texts franzos e taliens dateschan dalla fin dil 9avel tschentaner. Igl ei buca falliu da supponer ch'ins havessi era saviu scriver lu il romontsch e duvrar el litterarmein, sche quei basegns fuss staus allerta. Abstrahau da mudestas emprovas plitost casualas e dispoteivlas, entaup'ins pér entuorn 1200 igl emprem schatg scret ch'ins sa qualificar da romontschs. Igl ei in'emprova da translaziun interlineara, anflada en in codex da Nossadunnaun, il sforz d'in conventional (forsa in pader dalla claustra da Faveras) da declarar in priedi latin entras il lungatg dil pievel. Schegie ch'ei ha num esser precauts cun constataziuns, san ins dir ch'il romontsch fuva lu gia dètg conturaus. Il text da Nossadunnaun regorda tschadilà agl idiom sur-silvan. Forsa ha quei da far cun la derivonza dil «conventional» u digl autur che ha fatg la versiun. (Pareglia vol. I, p. 108 s.).


La scienzia linguistica, che urenta ils relicts romontschs ed oravontut ils numbs locals en las regiuns daditg germanisadas (Vallada dil Rein sut Cuera, Rezia Bassa, Purtenza e Scanvetg), eruescha plitost parallelas cun ils dialects dil Grischun central e cun l'Engiadina. Ensemes cun la versiun interlineara leventa quei gia pil temps medieval il pli tumpriv la damonda, daco ch'igl intsches romontsch ha survegniu sia variaziun idiomatica.

2. *Origin dils idioms romontschs*

San ins insumma rispunder cunvegnentamein a quella, vul dir pertgei ch'igl ei vegniu tier l'enconuschenta partizun idiomatica: jauer/vallader (Val Müstair, Engiadina Bassa), puter (Engiadin'Aulta), surmiran (Sur- e Sutses), sutsilvan/sursilvan (Sut- e Surselva)? Quei selai far mo a mesas.

Sco igl ei gia vegniu remarcau sisura, astg'ins supponer ch'ils lungatgs preromans fuvien en las regiuns ualti differents l'in da l'auter. Il schinumnau substrat, la stresa linguistica giufuns e pli veglia, ha influenzau la moda e maniera co recepir ed adattar il latin, co filtrar il vegl scazi da plaids e co pronunziar il niev lungatg. Cunfins administrativs medievals, forsa aunc pli vegls, han susteniu il svilup dils dialects en blocs d'ina certa coherenza. Ad Auas Sparsas denter Trin/Mulin e Flem sesanflava in cunfin medieval marcant. El sparta buca mo la Sur-dalla Sutselva, mobein era ils idioms dallas duas regiuns. En quei process ha era la configurazion dallas cuntradas en caums serrai fatg il siu.

Ils idioms romontschs



Cuntradas sco l'Engiadina Bassa, mo era la Val Müstair, han vi schinau ditg e liung cun igl intschess romanisau che deva en la Vallada sura digl En (encunter Danuder, Fuond e Puntina/Innsbruck) ni vi da tschei maun dil Fuorn encunter Damal e Bulsaun (Val Vnuost, Tirol dil sid). Da quellas varts han ellas lu era retschiert pli tard em prests germans en fuormas bavaresas.

L'Engiadin'Aulta, il Surmir e per part era la Val Schons ein vallas unidas muort lur posiziun stretgamein cun la retrotiara latina e pli tard cul lumbard. Influenzas lumbardas ein cheu pli pronunzidas. Cunzun en texts vegls dil 16avel e 17avel tschentaner semuosan las relaziuns cun la vischina Lombardia en moda eloquenta. (Pli detagliadamein leusura pareglia vol. I, nrs. 3, 5). Tratgs cumineivels partenent il scazi da plaids e la sintaxa tonschan savens dall'Engiadin'Aulta tochen lunsch viaden ella Sutselva.

Svilups historics ein denton el cass da surmuntar cunfins linguistics naturals. Quei vala cunzun per las relaziuns denter la Sur- e Sutselva. Il lungatg dalla Ligia Grischa, il sursilvan, ha dominau tschentaners alla liunga l'expressiun litterara el Grischun central. Omisduas cuntradas han dil reminent resentiu il pli fetg dalla pressiun constanta dil tudestg alemanic u gualser.

Ils stretgs ligioms dalla Surselva cul Surmir ein medemamein se fatgs sin premissas confessiunalas e politicas cumineivlas e cun agid dalla scola e dalla baselgia.

La tripartizion sbozzada sisura vegn secapescha relativada sch'ins fa ponderaziuns pli manedlas. Regiuns periferas (Val Müstair, Tu jetsch e Medel etc.), u meins suttapestas a novs svilups normativs u a nivellaziuns litteraras, han per ordinari mantenu fasas linguisticas pli veglias. Pli fetg ch'ins va anavos el temps e pli fetg ch'il romontsch sepaleisa sco ina tuaglia entira.

V Ils idioms da scartira sefuorman

Nums da loghens els documents latins vegls e circumscripziuns da tals el lungatg dalla tiara, cun scripziuns selvadias e variadas (per semiglia: Rietberg 1354 *sur lag ad awas fortas*; Cuera 1361 *prau da spedal*) tradeschan ch'ins havess gia daditg saviu scriver per romontsch, sch'ins havess giu il basegns.

Che quei ei daventau igl emprem en l'Engadin'Aulta ei perschuant e logic. Leu fuva il latin semantenius il pli ditg sco lungatg dils nuders, tochen siaden el 16avel tschentaner, senza ch'ins bratti

el cul tudestg, sco quei ei stau il cass en la part renana. L'emigraziun, il commerci sur ils pass, il survetsch sut crunas e las scharschas pli u meins cuzzeivlas tiegl uestg da Cuera sco signur feudal, havevan procurau per ina beinstonza pulit derasada. Las vischnauncas entscheivan a seformar e seprofilar, il cumin sefa libers plaunsiu dil domini episcopal. L'atgna schientscha crescha, e cun ella era la voluntad da dar expressiun cul mied dil lungatg al scalem pli elevau social e da patratg democratic. Per megliera capientscha dils biars entscheiv'ins a translatar impurtonts documents latins el lungatg dalla vallada. Sto esser che quei mavva senza pli gronds incaps. Denter ils vischins ed ella publicitat funcziunava il romontsch gia daditg. La fuorma romontscha scretta fuva denton zaco era gia prefigurada el scazi da plails ed ella sintaxa dils texts latins che zuppentavan mo malamein lur derivonza. Cumins e vischnauncas entscheivan a nudar e codificar per romontsch lur statuts, las leschas civilas e criminalas, protocols da decisiuns ed uordens locals.

Secapescha ch'ils eveniments historics grischuns han lur part vi da quei process. Las empremas rabantschas cun la casa da Habsburg-Austria, las incursiuns dils Grischuns a Buorm ed en Vuclina, mo oravontut la battaglia da Tgalaveina (1499) han fatg vegnir per tschartas las Treis Ligias da lur forza e pussonza. (Pareglia sutgart p. 202 ss.). Canzuns popularas da quei temps descrivan e decontan il niev sentiment. Ellas daventan probablamein impurtontas sco fuormas precursuras pils idioms da scartira ed oravontut per fuormas poeticas. (Mira p. 121 ss.).

Cun ils onns 1527/28 (Gian Travers) entscheiva ina litteratura manuscreta da noda politica ed historica.

Circa dil medem temps dateschan era emprovas da scriver en Surselva. Il contract d'allianza dils Franzos culs Grischuns digl onn 1549 ei, sco ins sa, vegnius translataus era per romontsch e repartius als menaders respectivs dallas Ligias. Igl ei da dubitar che quei seigi stau l'emprema gada ch'ins fageva in tal sforz. La cuida dils Grischuns fuva era pils auters ambassadurs (Vaniescha, Spagna/Milaun) buca meins impurtonta.

VI Lungatg e cardientscha

La Reformazion empunescha directamein vid il sulom stagiau sisura. Sias finamiras: il retuorn detschiert alla bibla, als evangelis, e cun quei alla «scartira», ed il patratg e sentiment religius nuncun-

venziunal, anflan tiels humanists ladins (Bifrun, Champel, Gallicius) adherents fervents e promoturs dils cudischs stampai (1552, 1560, 1562). La stampa, il niev pertader dalla cultura linguistica, ei a strada en nossas regiuns. La luschezia da quei fatg s'exprima en biaras prefaziuns.

In miez tschentaner pli tard sereghelia era la Sut- e Surselva (Bonifaci, Calvenzano, Nauli, St. Gabriel). Igl ei il temps dallas scartiras defensivas e cumbattivas (apologeticas) che defendan l'atgna confessiun e che tschercan da mantener per tut prezi las posiziuns contonschidas.

La Cunterreformaziun che suonda en quella undada sepusa vid las decisiuns dil Concil da Trent. Sustenida da vart politica (Austria e Milaun) envia ella la Missiun retica dils paders caputschins da Brescia. Els arrivan ella tiara e vegnan la finala da fitgar pei definitivamein en Surmir, en Sut- e Surselva. Ils paders brins emprendan ils differents idioms ed entscheivan a stampar en Lombardia ed a Vannescha ductrinas, cudischs da devoziun e legendaris. En Surmir davantan els ils piuniers digl idiom da scartira. En Surselva contribueschan els ensemen culs conventuals benedictins da Mustér da far penetrar e derasar la cultura religiosa barocca che tschaffa tuts ils camps dalla veta. (Pareglia cheutier vol. I, pp. 138 s.; 162 s.).

Cardientscha e lungatg contonschan el 16avel e 17avel tschentaner ina buglida cun rara vigur. Mo ils sgurdins grischuns entscheivan gia a mischedar da gust la cardientscha culla politica. L'expressiun romontscha resenta da quei el bien ed el schliet.

VII Novs temps, novas ideas

Ina dallas biaras ideas che la Revoluziun franzosa ha formulau ed accentuau ei stau quella dalla naziun e cun quei era dil vehichel che promova ella, dil lungatg. Ideas da quella specia arrivan el Grischun dallas Treis Ligias en in temps da crisa politica e culturala. Il vegl Grischun federativ va en muschna, sedisfa e semida plaun allaga suenter biaras pitgiras en in member e cantun dalla Confederaziun. L'aristocrazia grischuna ei sdernada, la Vuclina piarsa, l'idea dall'atgna forza e pussonza che contrahava cun naziuns europeas mo pli ina crosa vita.

Cul pass sur la sava dalla Confederaziun sesarvan escha e finistras anoviars e lain entrar da tuttas sorts novs currents e novas influenzas. Il resultat ei denter auter ch'ins entscheiva era a discutar, schebein il romontsch, partius en idioms, seigi propri il dretg instru-

ment per la nova orientazion ed integracions politica. Ils patriots, persevez adherents dil progress, ein buca perina. Tgi vul prender la caschun dil niev uorden politic per extirpar ed unfrir il romontsch en favur d'ina unitad grischuna e svizra pli gronda e tgunscha (H. Bansi, Th. Mohr; par. sutgart p. 38 s.). Tgi vul mantener, defender e cultivar el per tut prezi (P. à Spescha, M. Conradi; par. vol. I, p. 347 ss.).

Tonaton han las novas entschattas pil romontsch era varts positivas nunspitgadas. Al sforz dalla baselgia e dalla publicidad s'aschunta suenter 1830 era la scola romontscha. Gl'emprem instituida sin basa privata e communal. Uniuns da scola confessiunalas procuran pils emprems mieds d'instrucziun. A medem temps cun las scolas e cun lur stentas malulivas pil romontsch neschan e svaneschan gassettas romontschas en cadeina. Ellas han il meret da tener allerta la schientscha romontscha e la discussiun sur dil lungatg, mo era da slargiar las pusseivladads d'expressiun sin tuttas varts. (Pareglia vol. I, p. 237 ss.; sutgart p. 144 ss.). Cun las gassettas sederasa era ina mudesta belletristica, per gronda part aunc ina translatada, plaunsiu denton s'annunzian era mussaments poetics e novellistics cun agens tuns.

Viers la fin dil 19avel tschentaner eis ei la finala la scienzia e retscherca linguistica che valetescha e revaletescha il romontsch. (Mira vol. I, p. 28 ss.). Ella accumpogna d'entschatta enneu il moviment romontsch ed ei da buca pintga muntada (Joseph Planta, W. von Humboldt). Ascoli e Gartner spleigan en vasts studis cun caracter da model e muossavia la structura e la historia dil romontsch e da ses dialects. Els scuvieran las lingias da parentella e vischinanza cun il ladin central (dolomitan), cul furlan, mo era culs dialects lumbards.

Sper la scienzia linguistica per propri, che entscheiva a descriver manedlamein ils dialects e camps linguistics dalla cultura materiala, fa era la cultivaziun applicada e tgira pratica progress (vocabularis, grammaticas, cudsichs da scola, cudsichs da cant; pareglia vol. I, nr. 5, III).

VIII Lungatg e midadas socialas

1. Viafier e turissem

Il tetel «Lungatg e midadas socialas» savess ins maneivel dar a mintgina dallas outras parts dil present studi. Mo per propri vala el per la secunda mesedad dil 19avel tschentaner, cu la roda dallas midadas entscheiva a girar pli e pli spert. Quei semanifestescha verbal-

mein cun las viasfier e cun lur reit che tonscha tochen en las vals pli allontanadas e metta tierm all'isolaziun. Cul binari da fier crescha era il turissem ad egl vesent. Omisdus aspects confruntan il pur e mistergner, mo oravontut il lungatg e sia cultura, cun problems nunspitgai. Cun la construcziun dalla viafier mida in liug da cruschada sco Filisur en temps relativamein cuort maun dil romontsch vi sillavart tudestga. Sogn Murezi, in center da cura gia vivon enconuscents, lai buca dubitar, tgei quitaus ch'il turissem senza cunfins porta pil romontsch. Lu a mintga cass fuv'ins nunpreparaus pil niev svilup e nunprotegius dad eventuels prighels. En auters loghens ei il svilup staus pli tempraus, mo la finala buca meins virulents. Pli che mai ei ins vegnius pertscharts che l'expressiun romontsch stoppi sesarver a novs terrens ed a novas realitads. (Par. vol. I, p. 194 ss.).

2. Il moviment romontsch e sias entschattas

Ei fuva neras uras da ponderar, co ins savessi procurar per ina migliur e riscuder ils prighels.

Quasi sco il resultat d'ina schientscha e cunsenzia enfirmida ei se-constituida 1863 la Società Retorumantscha, l'emprema uniun culturala da tuts ils idioms. Ella iniziescha sin tuts ils camps quei ch'ins sa vess numnar la defensiun ed illustraziun dil lungatg romontsch: la raccolta e publicaziun dils documents vegls e da litteratura, da studis historics e linguistics. Siu emprem president, Gion Antoni Bühler, resca l'aventura dil lungatg da fusiu. (Pareglia vol. I, p. 352 ss.).

Dils 1896 entscheiva Robert de Planta cun las preparativas pil Dicziunari Rumantsch Grischun, in quita ch'el surdat 1904 alla tgi-ra dalla Società Retorumantscha, seconcentrond sez sin la raccolta dils numbs locals e da lur muntada per la historia culturala e linguistica dallas Alps. Il Cudisch da numbs retic che nescha ordlunder vegn elavuraus, redigius e publicaus dad Andrea Schorta pils numbs locals e da Konrad Huber per la part dils numbs da persunas e da famiglia. (Pareglia vol. I, pp. 106 ss., 290).

Gia avon Robert de Planta fuva Caspar Decurtins semess vidlunder da rimnar il material oral e scret per la Crestomazia retoromontsch en 13 volums. (Mira sutgart p. 106 ss.).

Consideradas silmeins l'entschatta sco lavurs vid il grond monum-ment d'in lungatg en declin, han ellas mobilisau forzas novas e fatg nescher novas speronzas. Ensemen cun la fundaziun dallas uniuns culturalas regiunalas (Romania, Uniun dals Grischs, Renania, Uniung Rumantscha da Surmeir, Renania) han quellas stentas pre-parau il terren per ina renovaziun (Renaschientscha romontsch).

La litteratura biala ha entschiet a flurir sut las pli diversas influenzas. En l'Engiadina in'expressiun litterara en la tensiun denter patria ed jester, denter idils dalla veglia Engiadina e svilups pli recents (G. Mathis, G.F. Caderas ed S. Caratsch), en Surselva ina litteratura ord la vesta dil mund puril aunc intact ni idealisau, mo era sin via da semidar (G.A. Huonder, G.C. Muoth e G.M. Nay).

La Renaschientscha romontscha ha giu il meret da carschentar il senn pil lungatg e pigl agen silmeins tier ina elita en tuttas las valladas. Auncallura san ins strusch numnar ella in moviment popular.

3. Smanatschas d'anoviards

Rizrazs linguistics ein plitost ina tradiziun dispoteivla dils Romontschs sezs. Mo avon eveniments europès han ins adina saviu far persenn che la latinitad periclitada dils Romontschs sa era vegnir sfruttada sco mied politic. Quei ei stau il cass en ina moda aunc migivla gia all'entschatta dil 19avel tschentaner cu l'Italia tschercava sia unitad e seregurdava mintgaton dil glacis roman ellas Alps (G. Vegezzi-Ruscalla, R. Bonghi; pareglia vol. I, p. 160 s.).

Oravontut s'annunzia quei prighel cun l'Emprema uiara mundiala. En quei spazi da temps crodan las polemicas hanadas cun linguists e scienziai talians (Salvioni, Del Vecchio) che contestavan al romontsch il caracter da lungatg independent e che vesevan en el nuot auter ch'in dialect alpin-lumbard. Las vuschs han cuntuau ed ein daventadas manifestamein irredentisticas cun ils activists dil faschissem. Valents auturs han menau la discussiun da vart romontscha. La consequenza ei stau ch'ils Romontschs han patertgau pli e pli fetg sur digl agen origin (J. Jud, K. Jaberg, R. de Planta, Ch. Pult, P. Lansel).

L'Engiadina cun sia liunga vischinanza cul sid ei secapescha tuccada sil viv dils tuns aspers si dall'Italia. Dapi tschentaners ha ella dirigiu ses idioms da scartira suenter canons talians da pronunzia, scripziun e scazi da plaids. Ussa vegn la reacziun, il giavisch bunamein fanatic da sefar liber dil frar grond, il clom pil retuorn allas atgnas ragischs linguisticas (Ch. Pult, P. Lansel). Podà ch'ins ei lu ius empau da lunsch, senza tener quen dil Grischun triling. Oz fussen nus Romontschs leds dad haver il talian sco scut e tschabergal, silmeins sco emprem lungatg jester ellas scolas secundaras e medias e senza dubi era ensemene cun el ina presenza pli gronda, directa ed actuala alla televisiun.

En la part renana fuva lu in'autra smanatscha jastra pli urgenta: la germanisaziun aviarta e zuppada. Ins sedamonda, tgei mesiras che seigien da prender per frenar quei svilup (G.A. Bühler, G.C. Muoth; pareglia sutgart p. 76 ss.).

4. La Ligia Romontscha e sias stentas

Commembers dalla Società Retorumantscha han clamaau 1919 alla fundaziun dalla Ligia Romontscha. Siu num regorda vid il stadi federativ grischun, vid las Ligias. Sco lezzas enquera ella dad activar mintga vallada e mintga idiom en in sforz cumineivel. Ella daventa dacheudenvi l'animatura dil moviment linguistic e cultural pratic el Grischun, articulescha dafertontier ils basegns e tegn allerta la publicitat e las instanzas svizras e grischunas. En consequenza sestabilise-schan ils idioms egl intschess da tschep. Il slontsch dall'economia e dil traffic fuva lu aunc en ballontscha. L'agricultura semodernisava, mo aunc senza segls anetgs. Il romontsch haveva da sbatter empau dapertut, mo ei fuva aunc da redember.

La vigelia dalla Secunda uiara, 1938, consacrescha ina votaziun svizra il romontsch sco quart lungatg naziunal. Igl ei in'enzenna marcanta pils inimitgs externs (irredentists, nazists): En temps da prighel siaran ils Svizzers lur retschas. En l'euforia dil grond mument han ins emblidau ch'ina minoritad viva buca mo da declamaziuns da simpatia. Ins ha tralasschau da veser l'entira problematica della damonda d'esistenza (definiziun e garanzia dil territori, scolaziun, publicitat)

Cun tuts ses malengasis ha l'uiara dau al romontsch in temps da calma e da flad. (Pareglia la contribuziun vol. I, p. 372 ss.). Mo igl ei stau ina calma enganusa.

5. Novas viultas ed ideas

Ils eveniments seprecipiteschan suenter 1945. Ins fa persenn che la punt denter l'Engiadina e la Surselva, la Sutselva e la Val d'Alvra, ei sin sbuar. Iniziativas originalas e beinmanegiadas han buca midau da num vid la situaziun (concept Gangale cun reit da scolettas egl intschess periclitau).

La conjunctura aulta en cumpleina vigur ha denton era tschaffau autres regiuns tochen ussa pli u meins intactas (Engiadin'Aulta, Domat, Bravuogn) e midau las structuras socialas. Il pur muntagnard, che haveva valiu tochen dacheu sco pli ferma petga dil romontsch, piarda sia muntada centrala. Las famiglias silla tiara davantan sco dapertut pli pintgas. La consequenza ei ch'ins concentrescha las scolas ni ch'ins siara insumma talas. Cun siu «Program da Schlarigna» (1951/53), che recuora dil reminent all'idea dallas Treis Ligias per saver francar meglier igl intschess e promover l'assimilaziun, mo era cun critica murdenta («La renaschentscha dals Patagons» 1949) empresa Reto Caratsch da destadar e sussentar ils Romontschs. Senza success!

Dapi il Secund concil vatican e sias ordras partenent l'evangelisaziun el lungatg matern, ha la baselgia dau impurtonts impuls alla veta dil lungatg. Mo la secularisaziun progressonta smasa igl effect contonschii. La munconza da spirituels e plevons indigens tucca omisduas confessiuns sensiblamein.

Las meglieras forzas van sin laver els marcaus ed en centers rejunals. Ei dat da patertgar che gleiti ina tiarza dils Romontschs ein sesents ordeifer igl intschess per propri. La mira da mantener la substansa romontschia egl jester ei ludeivla ed ideala, mo eis ella a pli liunga vesta da contonscher?

Malgrad ch'ins vegn buc unfis da giavischar e reclamar in turissem cun proporziuns dueivlas, sederasa quel ad in sederasar en tuttas direzioni. Vischnauncas el cor da diversas valladas e regiuns ein oz en cumplein svilup (Scuol, Savognin, Lags, Mustér, Vella). Han ellas la forza d'assimilaziun necessaria e la vigur da cunterballantschar ils facturs desintegrants?

Il sguard egl agen spieghel ei dirs e lubescha buca da far illusiuns.

IX Cuntermesiras e sguard egl avegnir

1. Las apprezzaziuns dil romontsch semidan

Sche nus legin quei che nusezs havein scret avon onns sut il tetel «Il romontsch en discussiun» (per semeglia Calender Romontsch 1969, 1973) vegnin nus pertscharts, con fetg che tut ei da cuntin en rocla. Agens patratgs en vesta al destin romontsch semidan e sediferenzieschan. Nuot meglier che quei! Ins va enconuschentamein mo inaga el Rein cun la medema aua. Gest quellas midadas e novas apprezzaziuns ein in'enzenna da veta pil romontsch ed en quei senn positivas.

2. Forzas zuppadas seregheglian

Las vuschs recentas en la pressa e la publicitat suenter ils onns 70 (principi territorial, revendicaziuns romontschas enviers il stadi, lungatg cumineivel interromontsch) han confruntau ils Romontschs cun la damonda d'existenza. Ellas ein vegnidas formuladas cunzun dils giuvens. Quei tut ei buca niev. Mo igl ei l'emprema gada ch'ils cloms vegnan da sutensi e ch'els indicheschian cheutras che la schientscha romontschia ei sederasada. Las pretensiuns van a pèr

cun ils sforzs parallels per la tgira dalla fatscha dils vitgs, dils monumets e baghetgs, per la protecziun digl ambient e dalla natira. Il risguard per las minoritads crescha e la solidarisaziun denter elllas medemamein.

3. Tschicerca d'identitat e consequenzas

Il plaid «identitat» vegn duvraus e strapazzaus oz empau daper-tut. El circumscriva il stadi dil carstgaun en pasch ed equiliber cun sesez e cun siu contuorn, quel ch'enconuscha danunder ch'el vegn, tgei che ha formau ed accumpignau el naven da sia emprema affon-za, en tgei cuminanza ch'el ei carschius.

Mo la schientscha e l'enconuschientscha dall'identitat fan lur pre-tensiuns ed han lur consequenzas. Buc il davos pil member d'ina mi-noritad che sto - sch'el vul mantener l'identitat - far e seduvrar du-blamein.

Quei sforz vul dir procurar ch'il carstgaun sappi sesviluppar en tuts risguards il meglier pusseivel. E cun quei ch'il lungatg ei il mied che lubescha da s'exprimer, da capir, leger e scriver, pia in svilup cumplein, eis ei mo raschuneivel ch'ins detti a sia cultivaziun dapli peisa.

4. Novas vias

Dapi onns laver'ins cun sistem per procurar al romontsch ed als Romontschs in meglier fundament d'existenza. Oravontut se-sprov'ins da carschentar la fidonza dils Romontschs en lur lungatg. Denter auter retracta ei da turnentar al romontsch sia valur sco mied da communicaziun e da prestige. El cuntegn gie, sco ins sa constatar, tuts ils elements d'in lungatg modern, e sia situaziun denter neolatin e tudestg arva grondamein sias pusseivladads da renovaziun. Mes-iras adattadas (planisaziun dil lungatg; neologissem; pressa, pro-grams da radio e televisiun) procuran persuenter. Gnanc da dir: il ro-montsch ei cheutras era daventaus denton tscheu e leu il lungatg dil paun e buca mo dil cor. Igl esser romontsch sto daventar enzatgei na-tural, natira, buca enzatgei sfurzau cun téf museal, buca enzatgei dic-tau da bunamanas e subvenziuns (B. Cathomas).

Ord quella vesta ei l'activitat dil Cantun Grischun e dalla Con-federaziun carschida il davos decenni ad in crescher (engaschament da translataders ufficials; cudisch da dretg; elavuraziun da mieds d'in-strucziun; instrucziun dalla biologia en las classas superiuras dalla sco-la primara; cuors da perfecziun per scolasts e carschi; romontsch sco rom da maturitad; professura da romontsch alla Scola politecnica eav.).

La Ligia Romontscha sezza ha slargiau ils pensums e las lavurs sin tuttas varts. Igl ei reussiu ad ella da contonscher en vasts cerchels svizzers ed ordeifer ina respectabla solidarisaziun. Quella survarga en qualitat per dabia quella dil moviment patriotic edemoziunal da 1938.

Cun ina stedia campagna d'informaziun ha la Ligia Romontscha era luvrau da piunier sil camp d'ina megliera entelgientscha e capientscha dils Grischuns da divers lungatg. D'in clima favoreivel el Grischun sez dependa grondamein la sort e situaziun dil romontsch.

Gnanc dubi: Ins ha fatg lunsch entuorn enconuschiantscha cun la problematica dalla minoritad romontscha el Grischun e less gidar dapertut e ton sco selai. Il co e cum ei denton discutaus e discutabels cunzun el Grischun sez: mesiras economicas e finanzialas per tener la glieud els intschess, stabilisar igl intschess sin via legala ni cun ina cunvegnientscha pli lucca (charta dils lungatgs), promozion d'in lungatg da scartira unitar e d'ina gasetta quotidiana, renconuschiantscha dil romontsch sco lungatg ufficial svizzer.

5. In lungatg da scartira unitar

En l'unda d'ina pli gronda solidaritatad romontscha ha era l'idea da scaffir in lungatg da scartira unitar puspei survegniu novs impuls. Suenter ils sforzs falli da P. à Spescha (1800), G.A. Bühler (1867) e L. Uffer (1958) e suenter ils svaris endinai ortografics en vesta ad emprovas d'avischinaziun (1957), ei quei gia per sesez buc in pign ughetg.

Il «Rumantsch Grischun», elavuraus dapi 1981 sco sistem (H. Schmid), ei severificaus sco in fundament ponderau e valeivel. El ha surmuntau senza memia gronds incaps ils emprems pass e gudignau ina retscha terrens tochen oz nunoccupai u maloccupai entras ils idioms (formulars da tutta specia, placats, inserats, inscripziuns, cudschs e registers d'informaziun generala etc.). En quei rom ha l'emprova survegniu sia atgna dinamica, ed ei vegn ad esser interessant da perseguitar nua ch'ins arriva.

Il «Rumantsch Grischun» ei poninsdir consolidaus sco «lungatg da canzlia». Mo igl ei era semussau ch'il pass da quel al diever general (scret e plidau) ei zun gronds e ch'el cuntegn biars prighels. En quei risguard dependa ei, co ins apprezziescha el e tgei spetga ch'ins ha.

Il «Rumantsch Grischun» san ins considerar sco ina finamira lontana, situada denter realitat ed utopia, quasi sco in fanal e simbol per la caussa romontscha che sa mo reussir en stretga uniun da tut las forzas.

Ins sa veser el sco in resultat contonschiu e nunalienabel, sco il «lungatg da canzlia», ch'ins sa baghegiar ora e rinforzar secund sco ils vers basegns sepresentan e leu nua che fuormas idiomáticas ein buca absolutamein necessarias. L'idea ch'il romontsch, ed ils lungatgs minoritars insumma, stoppi esser presents dapertut nua ch'ils lungatgs gronds, en nies cass il tudestg, tonschien, ei nungesta e nunrealistica.

Il «Rumantsch Grischun» san ins denton era considerar sco il lungatg da scartira per propri che duei remplazzar e substituir ils idioms. Sin quei scalem da ponderaziun entra la gronda cesura.

Ils suandonts patratgs (pareglia leutier era sutwart pp. 66 ss., 96 ss.) ein franc giustificai.

Il «Rumantsch Grischun», sez aunc ina enfiarla falombra, che sa viver mo dil suc e schit dils idioms, arriva en in mument da malsegirtad linguistica carschenta ed accentuada. La germanisaziun en sia fuorma zuppada, che s'effectuescha plitost sil spért che sil plaid singul e che tschaffa il maguol: la pronunzia, l'accentuaziun, la dicziun, l'expressiun idiomatica, s'avanza ad in s'avanzar. Ei il «Rumantsch Grischun», e cheu sepresenta la damonda cruciala, el cass da midar quella situaziun essenzialmein? Ins astga e sto dubitar da quei.

Neu dalla scola svizra vegn il giavisch pli e pli ferms d'introducir il franzos (respectiv il talian) gia elllas classas aultas dalla scola prima. Igl ei strusch d'untgir che silmeins la scola tudestga el Grischun vegn a stuer dar sissu ina risposta affirmativa. Mo con differenziada vegn quella risposta ad esser e tgei consequenzas vegn ella ad haver pil romontsch? Risguarda ella ch'ei dat gest als cunfins scolas tudestgas cun ina mudesta instrucziun romontscha che duess vegnir mantenida?

L'avertura politica ed economica viers l'Europa ei ina valur nun-enconuschenta. Las declamaziuns europeas per las minoritads cuntrastan cun la catscha all'economia efficienta e cun la tenuta centralistica da tiaras pussentas al tgamun.

Plinavon e per finir: Sch'ins tegn adaquen che la carga, ch'in member d'ina cumionza linguistica, era e cunzun d'ina tala minoritara, ei dad el anora promts e canlis da prender sin sesez, ei buca senza cunfins, vegn ins a sespruar da dosar sabiamein il diever ed ils pensums dil «Rumantsch Grischun». Scadin sfurzem dad instituziuns, mo era e cunzun da surengiu, sa mo haver in effect cuntrari.

